

四庫全書

集部

欽定四庫全書

集部

張莊僖文集卷三

詳校官庶吉士臣柳邁祖

中書臣劉源溥覆勘

總校官原任中允臣王燕緒

校對官庶吉士臣吳裕德

謄錄貢生臣李廷對

欽定四庫全書

張莊僖文集卷三

明 張永明 撰

乞停額外加徵疏

欽差巡撫河南等處地方都察院右副都御史臣張永
明謹題為懇乞聖慈憫念地方災傷俯賜停免額外加
徵府第工銀以蘇民困以固邦本事據河南府申據永
寧縣知縣謝魯申稱該縣原派伊府府第工料銀九百

六十一兩三錢五分三釐自嘉靖三十四年至三十七年俱已完解止有三十八年尚欠五百五十一兩三錢五分追併間近蒙欽差戶部劉員外按臨本縣嚴催節年京邊錢糧共欠銀五萬四千七百餘兩立限追徵又據通縣里老趙時興等連名告稱節年旱潦災傷積逋數多即今新舊驟徵併府第銀兩官校守逼民不堪命俱各逃竄告乞停徵等因到府卷查嘉靖三十四年五月內奉文議派伊府修理府第銀八萬六千兩除六千

兩陸續將在庫無礙贓罰等銀共五千九百七十兩九錢先已送赴該府收用外欠銀二十九兩一錢見今差官催取未送其八萬之數亦照原行自三十四年為始定擬八年為限每年於夏秋糧內帶徵一萬兩量其州縣大小分派不等至今五年之間已完解銀四萬九千三百八兩六錢四分七釐五毫八絲惟永寧縣止欠三十八年分銀九百六十一兩三錢五分二釐四毫二絲未解見徵在官者已有四百零八兩本府又查雒陽等

縣節年拖欠夏秋稅糧甚多自三十一年起至三十七年止不下十八九萬若別項銀兩勢在稍緩者其所拖欠誠不敢以盡舉夫朝廷與藩封孰重而孰輕京邊之與府第孰緩而孰急朝廷京邊錢糧則節年拖欠藩封府第銀兩則逐歲徵派殊失輕重緩急之序况河南一府地糧獨重雜役尤繁連年災荒十逃八九而王府官舍旗校人等擅自徑下州縣催徵騷擾官吏懼威嚴刑追比以致百姓破家蕩產鬻子典妻而國家額賦反坐

此拖欠即今王府工程皆已完畢而未徵銀兩尚有三萬餘兩若不預為酌處恐民力益不能堪國賦終不能完而欽差部使亦為徒勞爾矣本府因該縣所申目擊時艱不敢隱昧申乞照詳又據河南布政司提督糧儲左叅議袁洪愈呈稱看得永寧一縣拖欠京邊等項錢糧七八萬兩里老苦於催徵縣官申請寬緩至於王府祿米銀俱已完足又有府第銀五百五十餘兩未完官校守逼及訪得官校到於該縣怙勢逞威欺虐良善凌

辱有司無所不至不獨一縣為然本職隨處禁約但恐經過之後此輩仍復肆行合行裁抑及照府第銀兩似應奏請停止姑以目今時勢陳之本職於今年正月二十二日至河南府二十三日赴伊府朝王目見本府城牆宮殿周圍完固詢聞四面云非昔日之舊東西北三面未經查知其南面端禮門外多設門樓三重極其雄壯華麗並無未完工程夫工已告完而銀復派擾無端病民莫此為甚近見咨文皇上興建殿堂大小官員各

將俸銀獻進郡王以下隨力獻助工完停止夫以大工
若此其急内外臣工夙夜憂惕思仰贊不日之成而未
可得此之急而乃急於府第銀兩况府第已極完固
豈不得已者哉内帑缺乏邊儲告匱戶部題奉欽依差
官查催河南府所屬地方亦欲如數完納柰官校人等
守逼王府銀兩祿糧既已盡完府第又復催迫民急於
避害不能顧義急於彼必緩於此理勢自然夫京邊未
完宜急而反緩府第已完宜緩而反急此真所謂舛也

若不早為停止將來誤事匪細本職奉勅提督糧儲目擊時艱不敢隱忍合無轉奏將伊府修理府第銀兩除已完外其未完者盡數停免又據分守河南道右叅政亢思謙呈稱看得河南一府地瘠民疲原額稅糧獨重頻年旱潦相仍民貧徹骨歷年逋欠數多近因追併鞭朴一加逃亡相繼其流離困苦措辦不前蓋不獨永寧一縣為然也自嘉靖三十四年加派府第銀兩於夏秋糧內追徵每至三月之初伊府即差官校齎捧令旨分

至各縣直上縣堂坐於縣官之上主使掌印官嚴拘各里里老年頭人等立限追併急於星火倚勢凌逼縣官不敢少延竊惟伊府原奏開稱府第損壞照例修理近據河南府申稱該府新築重城創建門樓拆除官民房屋街道改闢府地寬廣倍前工作俱已完備夫工役已完而銀兩之徵似在可緩而各州縣尚嚴行追併以致民不聊生甚非為朝廷惠養小民之意也前項銀兩似應議擬俟京邊錢糧完日追併解府或待豐年帶徵或

奏請停止又據河南按察司分巡河南道僉事林騰蛟
呈稱本道巡歷至永寧縣隨據民趙時興等連名告稱
本縣連年災傷小民逃亡過半致遺累年各項正額錢
糧拖欠數多現蒙欽差戶部劉員外及督糧道袁叅議
按臨本縣追併又兼府第銀兩緊急現今差官在縣守
催日久小民粉骨碎身亦不能辦乞將各項錢糧暫行
停徵等情當將原差官錢錦喚入省諭回府不許在縣
騷擾并批行該縣查報又據該縣申稱查得該府原差

官錢錦孟思賢俱於嘉靖三十八年八月初八日徑自
下縣催取祿米府第銀兩本縣隨將祿米徵完孟思賢
於本年十二月初六日隨解祿米銀兩回府錢錦坐催
府第銀於本月二十八日又差禮生董堂承奉侄葉童
下縣嚴催本縣慮思激變小民省令本月三十日回府
惟錢錦在縣至三十九年二月初六日蒙本道按臨本
縣闔縣里老趙時興等具告錢糧急迫致蒙本道查出
錢錦在縣當蒙逐回備申本道又據河南府呈稱連年

不收額賦拖欠甚多則不獨永寧一縣為然而所屬十
四州縣大約事體相同矣現今內帑告匱聖明宵旰特
煩勅使督責甚嚴為臣子者孰敢為其私計府第銀兩
雖奉欽依給賜但以事勢言則今日內帑急而府第緩
以大義言則君上先而臣子後況本道近巡歷河南府
備視伊府宮殿規模倍舊工程一新靡有損缺未完如
蒙憫念民貧徹骨國賦燃眉所有該府所屬陝洛等州
縣府第銀兩暫行停徵以待豐年照數補給各等因申

呈到臣接管卷查先准工部咨為比例修理房垣保障
藩屏再乞天恩早賜完結以便安居事該伊王典樞奏
稱府第傾圯乞要修理該部議擬合候命下備行撫按
督同都布按三司等官查勘會奏等因覆題奉欽依備
咨行據布政司呈將委官勘估過該府修理府第合用
夫料工價等銀八萬六千兩分派各該州縣於每年徵
銀一萬兩陸續解送自行修理等情具呈前巡撫河南
地方都察院左副都御史端會同巡按河南監察御史

王題稱前項工價照數派解但地方災旱百姓不堪該本部議擬合候命下行令自行修理等因覆題奉聖旨既地方災傷且罷欽此欽遵外嘉靖三十三年八月內又准工部咨為府第年久損壞日甚已經撫按估勘明白工價未給再乞天恩早賜照例修理以保藩屏以壯國威事該伊王典揆奏稱府第傾圮乞要查照原估價數修理等因奏奉聖旨准照原估數目給與工部知道欽此欽遵備咨前巡撫河南地方都察院右副都御史

鄒案行布政司遵照徵解去後今據前因臣會同巡按河南監察御史孫議照河南地方田地瘠薄兼以宗室蕃衍祿糧倍增於前時差役頻繁徵派每溢於常額即其平日已難支持一遇凶年遂至狼狽是以節年以來積欠京邊額賦與夫會議銀兩約計百十餘萬至厯聖慮特使督徵尚未能辦目今帑藏空虛邊需孔棘內外並困其事勢誠急其為國計誠所當先者伊府修理府第工價府道各官咸謂該府宮殿現已修完仍被官校

凌逼催徵騷擾地方以重疲民之困所據里老趙時興等紛紛告訴其情誠有不得已也矧今皇上鼎建殿堂預處財用凡大小臣工許其獻進郡王以下亦聽獻助為親王者尤當仰體聖心顧乃屑屑於私計必欲取盈以剝民之膏血是豈急君父之義乎臣等查得大明會典凡諸王宮室自有定式今據督糧道呈稱目見本府城牆宮殿周圍完固詢聞四面云非昔日之舊東西北三面未經查知其南面端禮門外多設門樓三重極其

雄壯華麗分守道呈稱該府新築重城創建門樓拆除
官民房屋街道改闢府地寬廣分巡道呈稱備見該府
宮殿規模倍舊工程一新則與會典有違又查得問刑
條例王府祿米若本府官員內使旗校管莊人等干預
撥置擅自差人下府州縣催徵騷擾者旗校人等杖罪
以上發邊衛充軍官員內使監候奏請發落今該府擅
差官校錢錦孟思賢禮生董堂承奉姪葉童等絡繹下
縣直上縣堂坐於縣官之上守逼祿米府第銀兩恃勢

逞威欺虐良善凌辱有司無所不至則與條例有違聖
明在上宗藩不億莫不恪守王章而該府悖違若此是
豈守典承休之道乎再照當此荒歉之時青黃不接之
際貧民假貸於富室既無所得仰食於有司又不能周
復加該府催逼前項工價旁有追呼之苦下有捶剝之
災萬一釁鼓於一呼勢成於羣合將若之何況今遠近
多警邪黨易興所以萃其渙而繫其心者誠不可不早
見而先圖也所據該府未完府第銀兩多官目擊時艱

欲為停止情委懇切相應奏請伏望皇上軫念中原為
腹心之重地百姓係久困之疲民勅下該部再加議覆
將前修理府第工銀除已完外未完銀兩照數停免仍
將該府創建門樓等項查勘果否違式犯分應否改正
逐一具奏請自聖裁其撥置生事之人通行拏問照例
發遣庶憲典孔彰宗藩知警羣邪屏息閭閻輯寧黎庶
有更生之慶重地獲永賴之休矣緣係懇乞聖慈憫念
地方災傷俯賜停免額外加徵府第工銀以蘇民困以

固邦本事理臣等未敢擅便為此具本專差承差周讚親齋謹題請旨

乞停額外加徵第二疏

欽差巡撫河南等處地方都察院右副都御史臣張永明謹題為懇乞聖慈憫念地方災傷俯賜停免額外加徵府第工銀以蘇民困以固邦本事先據守巡河道督糧三道呈據永寧縣知縣謝魯申據里老趙時興等呈稱節年災傷積逋數多新舊驟徵因今伊府差官校錢

錦孟思賢等守催府第祿米銀兩民不堪命俱各逃竄
該各道查得該府新築重城創建門樓拆除官民房屋
街道改闢府第寬廣倍前工程完備前項未徵府第銀
三萬兩相應停免等因呈報兩院會本題奉聖旨該部
知道該工部覆題為照親王府第原係欽建分封其規
模體式俱經內監畫圖呈覽欽定遵行事干祖宗法制
國家典章嗣王所宜世世恪守豈敢擅易今查伊王原
奏止稱修理地方官曲意奉承輒估價銀至八萬餘兩

皇上篤念親親特允照給實天地高厚之殊恩古今希絕之曠典伊王正宜仰體聖心恪守常分止將損壞處所修理為當却乃弗安祖制束機僭踰擅將官民房屋街道恣意拆除改闢寬廣據稱南面端禮門外一處已增設門樓三重則其餘可知况工既完備則價銀自應停止差人下縣既明有禁例錢錦等豈宜擅差地方以令旨行事既經撫按官會題前因相應勘究但事關禮制今候命下移咨禮部題請差官給勅前去河南會同

該撫按逐一查勘原欽建府第有外牆為限廣濶若干
今牆外拆除官民房屋街道若干南面端禮門外曾否
增設門樓三重是否祖制其餘拓開官民基地曾否豎
造何項房屋有無僭踰明白畫圖貼說具由叅奏恭候
聖裁其餘應叅官員及應究人役聽照例施行原派工
價銀兩既已工完本部行令即便截日停免撫按官仍
明白曉諭以安窮民等因奉聖旨是除工銀停免外又
該禮部題奉欽依差禮科給事中龔某前來會同撫按

查勘間承奉葉全等撥置伊王送與房主李鸞等房價私和泯滅李鸞等將銀錢首縣貯庫葉全等又撥置隱情奏奉欽依備行院科會委按察司副使郭朝賓布政司叅議王遴分委知府等官陳慶李天榮等會問得犯人吳希同係伊府儀衛司校餘由監生任知縣革職招稱該府承奉等官葉全等撥置展拓府第創建重城門樓移護衛長史司等衙門於王城之內逼換方城王府第及侵占桐城郡主府第各一所强占河南府學文昌

祠基洛陽縣監并養濟院法藏寺及儀賓韓應壁等鄉
宦軍民陳大壯喬岳等各房基共三百八十餘間窰院
十七所土窰十六空計地一頃餘畝侵占官街採取軍
民樹株擅用官車裝運強擡軍民周自省等一十七女
擅立東厰緝訪生事詐財修城使用及違例擅差軍校
錢錦等下縣逼催府第祿米銀兩索要大戶銀錢并承
奉趙用蔡朝詐傳令旨辱打知縣謝魯等項俱實問過
充軍吳希同等二十九名杖罪謝魯等十二名脫逃照

提田五峰等九十名有罪聽叅葉全等六十二名并將
伊王違制等情叅稱仰惟聖祖欽定格式永為萬世之
章程皇上特賜工銀尤出一時之曠典況不許犯分之
明訓煥然如新不必更改之綸音昭然在上伊王典橫
本以親藩嗣封中土正宜畏天保國恪遵祖訓之嚴樂
善承家仰答聖恩之重却乃恣已驕盈憑人撥置駕言
修葺因肆更張門創建乎三重城遂過乎百堵逼遷郡
王之第廟擅取先師之學宮強占民居周圍廢二百家

之市併吞官舍縱橫侵五六道之街妄擬天闕之尊嚴
不畏皇言之炳赫明知僭踰務壯麗以示威越例科求
必饜足而後快始而刼制委官估勘多虛已豫設改闢
之計既而奉有成命任意拆毀復行其專擅之私若謂
新闢丈尺止是遵照會典之文然原制欽定於聖祖者
豈當擅易若謂置買房基俱在原估丈尺之內則當時
上廛於睿覽者何不具陳似此僭踰乃大違於聖訓即
其恣肆實深負乎聖恩蓋惟羣小相誘以致王心不檢

俱有實跡殊非小過合無將違制重城勅令改正其逼換方城王府第舊基行令伊府造還居住該府内外文武有罪官員通行提問查照律例奏請發落及將侵損銀物強擡女子等項各給主收領以警將來則國典愈彰而小民永賴矣再照該府因建重城不俟奏請輒將護衛衙門移於重城之内今擬改正其護衛相應仍還舊處及查護衛原額旗軍二千名今軍餘共一萬四千六百五十餘名又儀衛司原額校尉六百名今正餘共

六千六百餘名蓋其封國年久生齒日繁遂使餘丁多
於正額向屬承奉司占用辦納銀錢倚勢作威凌辱官
府百姓皆由此輩為之深為王累失今不治恐事久則
難變勢重則難圖實非所以善王後也伏候命下合無
查照伊府護衛儀衛司仍留正額名數摘撥守禦王城
輪直宿衛其剩下餘丁盡數查出編成隊伍或量改一
千戶所或併屬河南衛督率防禦城池分班赴省操備
或查照魯府奏准撥補郡王府校從事例止許單丁摘

撥不許隱占闔戶人丁中間逋逃影射貫籍不明者許
首發附近州縣編當民差則地方緩急有賴可無意外
之虞矣惟復仍舊存畱及照伊府因建重城長史司每
傳奉伊王令旨發放一應事務如謀占官民房基起派
車兩採取土石刷選女子捉拏平人皆以令旨行之以
致軍衛有司衙門多被鈐束該府內外官員舉奉成案
殊非朝廷篤念親親安享富貴及設官分職愛養小民
意伏乞天語叮嚀戒諭伊王止治其國內官僚不必干

豫有司之事若有事情重大應合奏請者奏聞朝廷區
處更宜嚴禁本府官校人等不許假稱名目詐傳令旨
違法生事若有稔惡不悛及額外投充者事犯聽法司
究問如例如遇王府發放事務敢有不俟奏准輒自奉
行者聽撫按官指實論劾有司以罷輒罷職軍職改調
邊方庶幾吏稱共職民安其業而宗室將享磐石之固
與國同休萬年無疆矣等因連人呈解院科會審明白
畫圖貼說招叅會本題奉聖旨禮部會同三法司叅看

了來說查覆間又該伊王奏辯奉聖旨禮部三法司一併看了來說該三法司叅看得伊王不遵祖制增建城牆三重門樓三座逼換郡王府第侵占學宮廟祠官民房基地土等項及叅承奉等官葉全等大肆撥置罪犯深重并問過犯人吳希同等各情罪明當俱有顯跡遵奉明旨查叅題覆間又該伊王具奏知府張柱等索要謝儀僉事林騰蛟扶同添捏及稱各官私造囚車扭鎖逼死人命等項但辭出一面恐涉遮飾必須差官再勘

方可定擬其增設重城門樓先該給事中龔某巡撫張永明等委官丈量畫圖貼說進呈似已明白今稱一甌一瓦率由舊式亦應究明相應照例題請差法司錦衣衛堂上官各一員會同撫按行委隔別官員將伊王奏內事情逐一勘究要見各官是否懷私扶害其李學先等是否逼打致死其修理府第是否率由舊式其餘各項事件及應叅應問人犯照例提問明實與給事中龔某等原勘情節一併類招具奏定奪題奉欽依差刑部

左侍郎趙某錦衣衛都指揮萬某會同撫按勘問隨該
各官題委山西叅政陳洪濛山東副使雷夢麟前來會
勘間又該伊王屢次奏辯俱奉聖旨這事情着差官去
一併勘問來說欽此備咨前來會行各官逐一勘問明
白具招連人呈解部衛兩院會審無異叅照承奉正葉
全承奉副趙用武昇門正王俊門副蔡朝典膳副葉相
典服劉用內官彭宣李陽劉朝王用內使徐進閔志苑
江宋天福張春徐堯書辦官王永壽任良弼魏科均屬

宦使咸預中謀煽習傾危構成黨類多方撥置自謂各
職為王之爪牙互肆兇殘罔思百姓係朝廷之赤子漁
獵蠶食破產者奚啻數百餘家狐假虎威致死者不止
二三餘命或故違招集之例談風水以蠱惑王心或明
知創建之非假欽依以箝塞衆口巡視巡捕僭稱東廠
之名採石採青忍奪小民之利詐令旨而奴辱縣令肆
志弄權改勘合而刷選宮人甘心導慾官府畏威喪氣
莫敢誰何士民飲恨吞聲無門籲訴即今悲號無慮千

口良由威劫已積二十年始焉估勘多虛致加派糧銀之八萬既而展拓彌廣遂擅起蕭牆之二重街署悉被其橫侵第舍俱遭其席捲承奉葉全武昇蔡朝趙用罪惡貫盈法應首論內官宋隆鄭卓內使關保儀衛正芮宣儀衛副高節孫勝典膳副華誠夫典仗黎民靖兵馬指揮方時碓陽中護衛指揮李官百戶余兆鎮撫談世祿工正黃鑑工副謝霓儀賓郭一桂潘溱比周為黨獻諛成風或逢迎敗度縱富樂院之歡呼或隨從出城肆

演武場之遊衍內方時進逼遷府第反噬宗枝闕保彈
射平人忍令殘廢談世祿芮宣孫勝指債負以漁利股
削脂膏仗威勢以欺民橫索財賄誅其助惡之心當從
改調之例內使齊貴久嫉生儒之號愬陰蓄報復之私
讐撒石灰以挫辱衣巾致擁潰而踣傷人命罪有所由
法應併究河南衛先掌印今管操指揮王錫官叨世守
性實詭隨既估勘之徇情仍覺舉之無狀委屬瘰癧罪
豈容辭本衛中前所副千戶張洙本以懦夫罔知職守

明見伊王之出郭曾無一字之攔阻右所百戶林鎮衰
病餘年昏庸喪志納礦徒之賂既已自弛隄防引袖匿
之金復爾公行囑託招尤啓侮罪悉由茲長史司見任
左長史汪師召右長史王潤職司輔導志乏匡維俛首
怙終唯唯惟知竊祿傍觀方蹶依依豈得無言律以官
常責誠難追洛陽中護衛指揮溫如玉叨綜篆之虛名
昧典守之大義易府第為護衛曾不執法啓陳遷護衛
於重城又不據實申請若不量為調處無以懲戒詭隨

先任右長史陳澶素行依阿未聞納約明知公署之改建並無諫阻之忠猷久曠厥官法應追論王府内外文武各有罪官員相應通行提問查照律例問擬奏請發落庶警將來職等竊照伊王典模本以親居藩服嗣承中土之封允宜世篤忠貞永法東平之善庶幾恪遵祖訓思報皇恩却乃志欲更張事多違制妄信堪輿之術頓萌圖大之心駕言葺修擅行展拓城連百雉俄驚府第之崢嶸門建三重敢擬天庭之峻偉蹈春秋無將之

戒昧藩輔謹守之規任羣小之縱橫致流毒之滋蔓徇私逞暴則逼奪郡府以及先師之學宮歛賄宣淫則強娶室女以及已配之民婦率衛騎而出城賞犒殊駭聽聞挾銀錢而非禮遨遊尤乖統紀積愆具露奏勘已行蒙聖恩未即譴懲奉明旨特加查勘尤宜感乾坤高厚之德意遵日星炳煥之綸音引咎責躬據誠俟命却又聽撥置而再三浮辯肆撫拾以掩飾前愆不候聖裁屢干天聽既非臣子恪恭之義又違祖宗訓典之嚴據跡

原情似非小過伏乞聖明裁處其違制重城及強擡婦女合無仍照前勘勅令改正復舊退出給親惟復俯念親王各姑准存留職等未敢擅擬均乞聖裁再照該府因建重城擅將護衛衙門改建重城之內先該給事中龔情等題稱相應仍還舊處其護衛原額旗軍二千名今計軍餘一萬四千六百五十餘名儀衛司校尉六百名今計正餘共六十餘名向屬承奉司辦納銀錢倚勢作威凌虐士庶皆由此輩為之深為王累失今不治恐

後生齒益繁逋逃日聚事久難變勢重難圖非所以善
王後也相應仍留正額名數摘撥守禦王城輪直宿衛
其餘剩下餘丁盡數查出編立隊伍量立一千戶所或
併屬河南衛督率防禦操備叅稱該府長史司每遇發
放地方事務皆以令旨行之以致軍衛有司多被鈐束
殊非朝廷設官分職愛養小民至意懇乞天語叮嚀戒
諭伊王止治其國內官僚不必干預有司之事若有事
情重大具由奏聞區處更宜禁約府內官校人等勿得

假稱名目及額外投充違法生事若有故違聽撫按衙門指實叅論各一節誠為遠慮相應一併議處通行禁革以上事情關係重大皆非職等所敢輕擬仍乞勅下禮部會同三法司再加議擬奏請定奪施行緣汪師召王潤陳澶溫如玉黃鑑謝霓李官談世祿芮宣高節孫勝黎民靖余兆係王府文武官王永壽任良弼魏科係書辦官葉全趙用武昇王俊蔡朝葉相華誠夫劉用彭宣李陽劉朝王用宋隆鄭卓徐進閔志苑江宋天福張

春徐堯關保齊貴係內官內使郭一桂潘濤儀賓方時
進係王親緣係懇乞聖慈憫念地方災傷俯賜停免額
外加徵府第工銀以蘇民困以固邦本及節奉欽依事
理職等未敢擅便為此除具題外今將問過招由理合
開報

擒獲巨寇疏

欽差巡撫河南等處地方都察院右副都御史臣張永
明謹題為仰仗天威擒獲巨寇懇乞聖明亟賜典刑以

靖地方事據河南按察司呈准副使沈科會同布政司
掌印右布政使毛愷都司署印署都指揮僉事王鴻業
守巡大梁道右叅政亢思謙僉事張學顏會問得賊犯
王瑟等叅呈到臣據此卷查先准兵部咨該臣題為地
方賊情事奉聖旨該部知道欽此欽遵該本部看得前
項強賊煽惑構結殺人刼財所至震驚誠為可虞雖該
本官題稱調兵勦捕俱各逃散然渠魁未獲勢必復萌
相應亟為殄除合咨前去煩為會同巡按御史嚴督統

兵將領并守巡兵備府州縣官員多方緝捕務將真正首惡逐一擒獲明正法典現獲賊犯盧文車等問擬招罪并將有功有罪人員一併查明具奏施行等因備咨前來臣會同巡按河南監察御史孫永思案行都布按三司守巡兵備等道并該府州縣衛所掌印巡捕等官嚴督軍兵多方緝捕及行據按察司會同守巡兵備各道勘問賊犯盧文周等招由呈解臣等審發該司監候具題間隨據布政司候缺吏李琚將首惡賊犯王瑟并

夥賊岳隨及據開封府并西華縣各差人協同拏獲夥賊王天佑等押送到臣切照王瑟等俱係元惡大憝為患地方已非一日今顧禡魄於官兵之追逐零落潛逃摻捕殆盡是皆仰仗天威之震懾廟謨之勝筭固非臣下所能効其力也除將各賊犯審明批發該司會勘併招去後今據招呈前來臣會同巡按河南監察御史孫永思反覆叅詳無異除批行該司將賊犯王瑟等監候奏請其被殺鄉夫宋虎行令該縣量處無礙銀兩徑給

其家以示優恤獲賊有功武生義勇等役劉衍祚許太等量將現在贓物差等給賞布政司候缺吏李琚擒獲首惡功勞可嘉准陞通吏以示激勸外叅照河南都司宣武衛指揮使馮銘職司巡捕才極疎庸強賊縱橫既不用心于追捕奸軍賣放又不持法以痛懲虛捏文移恣行欺妄罪責難辭法應重究扶溝縣林朝卿原任太康縣知縣今陞山東東昌府通判邵鳴岐職忝專城先事乏馭防之策釀成惡孽臨時失剿捕之機開封府通

判蔣山扶溝縣典史車承爵太康縣義官馮社官司巡捕而事變失於稽防禍將延蔓而勢力難於支救內蔣山緝捕頗効勤勞功過似應相准林朝卿邵鳴岐車承爵馮社雖有追捕之功難掩失事之咎再照布政司左叅政今陞廣東按察使熊遼原任京營佐擊將軍今推補通州遊擊將軍吳子英祇承統兵之委而即日戒行方張掃衆之威而羣兇遠遯况吳子英家丁有擒賊之績尤可徵其指示之能宣武衛指揮使劉世恩署指揮

僉事何遵約林壩或領兵而勞勩之不辭或緝捕而後
先之用命開封府知府周文陳州衛指揮僉事黎思後
布政司理問所理問今陞河南府通判游良器案牘王
邦佐尉氏縣知縣張元中陳州判官梁國衣鄆陵縣典
史黃棟西華縣知縣陶文淵典史王格常社巡檢司巡
檢簡永年職雖有崇卑之異而捕賊之功則均獲雖有
多寡之殊而効忠之心則一通應獎勵以上有功有罪
各官并前項所問情罪臣等未敢擅擬均乞皇上勅下

該部再加查議上請合無將賊犯王瑟等十八名速賜
典刑王瑟盧文周盧文現王琴闕大斌謝枝岳隨仍照
例梟首示衆以正國法馬江等與知縣等官林朝卿等
發遣發落陸續未獲強賊劉奉等容令臣等嚴行守巡
兵備等官查照節次卷案督併各該掌印巡捕官兵緝
拏并未到趙三等另行問結供明李琚等并告實宋景
和等省候外其馮銘重加究治邵鳴岐免究熊達等量
為分別獎賞庶賞罰明而人心知所勸懲盜賊寧而地

方可保無虞矣惟復聖明別賜定奪緣王瑟等俱重刑
例應奏請處決梟首示衆馮銘係軍職林朝卿等俱文
職及奉欽依并仰仗天威擒獲巨寇懇乞聖明亟賜典
刑以靖地方事理未敢擅便為此今將前項會問過招
罪緣由開坐具本專差承差周茂親齎謹題請旨

乞處補祿糧疏

欽差巡撫河南等處地方都察院右副都御史臣張永
明謹題為歲支原額不敷并災傷減免以致祿糧缺欠

數多懇乞天恩俯賜處補以濟宗藩以安地方事據河南布政使司呈稱查得周趙等府原額歲派郡王粳粟祿米共徵銀九萬四千六百八十五兩四錢六分內唐趙宗鄭伊五府銀三萬餘兩舊規於分封各府關支周府銀五萬兩徽府銀一萬餘兩於本司關支先年宗室尚少歲派可足歲用近年宗室繁衍祿糧日增唐崇等府尚可處補至於周府宗儀嘉靖元年止一千一百二十八位員嘉靖三十八年增至五千五百五十六位員

以今與元年較之蓋五倍矣每季共用祿糧七萬七千五百餘兩一年共用銀三十一萬有奇除額銀五萬餘兩尚該銀二十六萬餘兩不敷支用向因各府宗儀歲歲逼擾本司勢不得已乃至請留京稅那借官銀計自嘉靖三十年起至三十七年止凡請留者六次銀數甚多俱已支放不勝悉陳其節年借過冠服協濟贓罰地畝鹽鈔編刺等銀共八十三萬六千八百九十餘兩至今無計補還即以目下言之三十八年分并三十九年

春季計五季該放本色祿糧銀三十八萬九千八百六十餘兩又三十六三十七三十八計三年該放折色鈔銀五萬六千八百餘兩二項共該銀四十四萬六千六百六十餘兩庫內應支正項祿糧銀止有二萬二千四百四十三兩有零尚欠銀四十二萬四千二百餘兩無從湊處各宗貧苦無柰動以百十成羣赴司諠嚷本司輾轉思惟束手無策欲取之于庫藏則年復一年搜括已盡欲取之於百姓則邇來常賦之外加輸更多民力

何堪公私之際萬分難處且去歲本省中牟等六十三州縣災傷重大題奉欽依除例不災免外實免過存留麥米二十三萬九千七百三十餘石止徵存畱糧五十八萬四千一百三十餘石有司衛所等衙門官吏師生旗軍校尉人等歲該月俸等糧六十九萬三千餘石仍欠糧一十萬八千八百六十餘石不敷支給况宗室惟賴常祿以資日用官軍又藉月糧以供養贍乃至積欠數多而復當此凶荒之歲其勢不得不苦苦告討再照

各省藩封獨河南最多各府宗室惟周府蕃盛歲祿日
增歲派有限節年湊補別無長策為今之計若不預為
議請誠恐日前之急迫難支而意外之隱憂不細及查
先該撫按衙門會題該戶部議行少派起運多派存留
候會計三十八年錢糧之日再行會議今三十八年派
徵稅糧勘合存留又未多派仍復災免過存留麥米二
十三萬九千七百三十餘石其祿糧亦係存留蠲免之
數不無愈加難處現今各宗疾首蹙額仰給無聊各該

官軍員役紛紛呈告催討情甚迫切誠有不忍聞見者
合無憫念地方災傷祿糧匱乏事勢危急速將後開應
請錢糧乞為題請庶使祿糧少得接濟而宗室官軍人
等俱有攸賴矣等因具呈到臣接管卷查先准戶部咨
為可憐極貧宗室乞討累年祿銀急救多命事該前巡
撫河南等處地方都察院右僉都御史章煥巡按河南
監察御史楊惟平會題該本部議將扣留保定等倉提
編等項銀兩補給祿糧支用及議將少派起運多派存

留三五十萬石專備祿糧支用候會計三十八年錢糧
之日再行會議定奪奏請等因覆題奉欽依備咨前來
已行該司遵依外今據前因臣會同巡按河南監察御
史孫永思議照河南一省夏秋存留稅糧額有定數各
王府宗室蕃衍無窮祿米歲增與各官軍人等俸糧數
多一歲所入本不足以供一歲之用况各年災傷拖欠
并節蒙聖恩減免雖經前撫按官屢為奏留并搜括那
借各項銀兩湊補支給然欠多補少日益不足計今周

府宗儀該支三十八年分并三十九年春季計五季本色祿銀三十八萬九千八百六十餘兩又三十六年三十七年三十八年共計折色鈔銀五萬六千八百餘兩二項共該銀四十四萬六千六百六十餘兩該司庫內應支正項祿糧銀止有二萬二千四百四十三兩有零尚欠銀四十二萬四千二百餘兩有司衛所等衙門官吏師生旗軍校尉人等三十八年災免存留欠糧一十萬八千八百六十餘石無從處給臣自接管以來適當

兩河荒歉之餘百姓困憊之日節年錢糧拖欠一時難以併徵衙門倉庫空虛官司別無積蓄各該宗室貧苦無柰動輒百數為羣赴布政司喧嚷逼迫各衛所官軍人等雖不敢逼迫然其伸訴哀痛之情亦不忍聞今據該司所呈乞要比例請討後開各項錢糧存留免解那移補給蓋亦目擊負欠之多身當索乞之擾誠非得已况王府宗室出入有防別無營運衛所官軍班操不息亦非生理身家所賴專藉祿糧今各經年累月不得闕

支何所取給逼迫哀訴事在窮蹙無足怪者仰惟聖明
在上仁同天地靡所不周顧茲中州重地宗室官軍人
等使其窮乏如是何以仰副我聖明敦睦仁愛之心耶
臣待罪地方職在綏輯錢糧軍馬尤其首務當茲錢糧
缺乏又值連歲荒歉夙夜焦勞計無所出伏望聖明憫
念宗室并官軍人等迫切至情乞勅下戶部從長議處
比照前例將布政司所呈後開各項錢糧免解仍多派
存留三五十萬石專備本省祿糧支用庶宗室官軍人

等皆有所賴而地方可以無虞矣臣等未敢擅便為此
開坐具本專差承差朱棟親齎謹題請旨

一比例多派存留查嘉靖三十二年為申明宗
室法制以廣仁恩以光聖治事該前巡撫河南右
僉都御史楊宜巡按河南監察御史霍冀會題議
照河南額糧一歲存留之數不敷祿糧一歲之用
要將本省夏稅秋糧多派存留二三十萬石其或
不足仍乞議定於何處撥補奏行戶部議覆准將

嘉靖三十二年原派起運保定等倉米豆共扣留銀三萬二千四十餘兩俱留本司專備祿糧支用訖嘉靖三十七年為可憐極貧宗室乞討累年祿銀急救多命事該前巡撫河南右僉都御史章煥巡按河南監察御史楊惟平會題自三十七年為始少派起運多派存留三五十萬石等因奏行戶部議得三十七年會計已過候會計三十八年錢糧之日再行會議定奪奏請覆奉欽依咨劄前來

案行本司遵依訖今查三十八年分派稅糧勘合
又未多派存留合無將會計嘉靖三十九年錢糧之
內查照前議事理自本年為始以後每年少派起運
多派存留三五十萬石專備本省祿糧支用伏乞聖裁
一比例扣留起運保定等倉糧銀卷查先為地方
災傷事嘉靖三十年該前巡撫河南右僉都御史
陸某巡按河南監察御史王楠會本奏行戶部准
將嘉靖三十年保定等倉米豆每石該銀八錢止

解銀五錢扣留三錢河間等倉粟米每石該銀六錢止解五錢扣留一錢補給祿糧又為地方連年災傷歲派不敷歲用錢糧匱乏亟為上請早賜計處以補祿糧以備賑濟及防秋軍餉事該前巡撫河南右副都御史謝存儒巡按河南監察御史浦之浩會本奏行戶部准將嘉靖三十一年保定等倉米豆每石該銀八錢者七錢五分者止解五錢扣留三錢二錢五分河間等倉粟米每石該銀六

錢止解五錢扣留一錢專備補給祿糧支用又為
申明宗室法制以廣仁恩以光聖治事因夏秋災
傷該前巡撫河南右僉都御史楊宜巡按河南監
察御史霍冀會本奏行戶部准將嘉靖三十二年
保定等倉米豆每石該銀八錢止解六錢扣留二
錢河間等倉粟米每石該銀六錢止解五錢扣留
一錢專備祿糧支用嘉靖三十七年又為可憐極
貧宗室乞討累年祿銀急救多命事該前巡撫河

南右僉都御史章煥巡按河南監察御史楊惟平
會本奏行戶部准將嘉靖三十六年起運保定等
倉米豆每石該銀八錢者止解六錢扣留二錢河
間等倉粟米每石該銀六錢止解五錢扣留一錢
二項共該扣銀二萬五千五百七十三兩三錢七
分一釐八絲專備補給祿糧支用訖合無比照前
項節年奏准事例將嘉靖三十八年坐派秋糧起
運保定府廣盈左右二倉易州倉唐縣新興倉涿

州常盈倉良鄉縣豐濟倉粟米黑豆共一十萬五
千七百七十一石四斗俱每石徵銀八錢止解六
錢扣留二錢該扣銀二萬一千一百五十四兩二
錢八分河間府倉及巨盈倉真定府豐盈倉定州
永豐倉粟米共六萬八百六十四石四斗八升俱
每石徵銀六錢止解五錢扣留一錢該扣銀六千
八十六兩四錢四分八釐二項通共扣銀二萬七
千二百四十兩七錢二分八釐免行解部存留本

司補放祿銀支用伏乞聖裁

一比例請討減價銀兩卷查先為屢催缺乏祿糧不能補給懇乞再為奏請以安宗室以慰官軍事嘉靖十四年該前巡撫河南右僉都御史簡霄巡按河南監察御史蔡駿會本奏行戶部准將本年原派秋糧起運壩上東馬房等倉黑豆每石該銀八錢止解六錢扣留二錢補放祿糧嘉靖十八年又為地方災傷欠缺祿米無從措處等事該前巡

撫河南右副都御史胡纘宗巡按河南監察御史
陶欽夔會本奏行戶部准將本年秋糧原派起運
壩上等倉黑豆每石徵銀八錢止解七錢扣留一
錢補放祿糧合無比照前例將嘉靖三十八年坐
派秋糧起運壩上東馬房倉東直門裏牛房倉湖
渠馬房倉湯山草場倉北草場倉黃土倉壩上北
馬房倉壩上南倉御馬倉壩上倉黑豆共一萬五
千一百五十一石六斗五升俱每石徵銀八錢止

解六錢扣留二錢共扣銀三千三十兩三錢三分
准留本司補放祿糧支用伏乞聖裁

一查復派剩以濟缺乏簿查嘉靖十九年以前坐
派夏稅派剩各馬房倉小麥三千二百一十三石
有零每石折銀六錢五分秋糧派剩各馬房倉粟
米三萬七千三百九十一石有零每石折銀六錢
俱存留本布政司官庫收貯以備祿糧支用自嘉
靖二十年起至三十四年漸次減派至三十五年

以來盡數改派太倉并光祿寺等倉遂致本省祿糧缺乏難以措處合無查照先年原派事規自嘉靖三十九年為始以後年分仍將派剩夏秋各馬房倉麥米照舊坐派本司存留補放祿糧支用伏乞聖裁

一比例請留太倉草價銀兩卷查先為糧鈔存留有限祿糧增添無窮歲派不敷歲用更加災例減免借支邊糧價銀數多無從補解懇乞天恩早賜

議處以濟國用以惠宗藩事嘉靖二十三年該前
巡撫河南右副都御史碓昂巡按河南監察御史
吳悌會本奏行戶部准將本年秋糧原派京倉黑
豆銀太倉草銀二項共銀六萬四千四百二十七
兩八錢六分存留本司以濟缺乏祿米支用合無
比照前例將嘉靖三十八年坐派太倉銀庫草一
百三萬一千九百七十八束每束折銀三分五釐
共該銀三萬六千一百一十九兩二錢三分免行

解部准留本司補放祿糧支用伏乞聖裁

一比例請復起運京邊糧草扣下餘銀卷查先為
屢歲缺乏祿糧不能補給懇乞再為奏請以安宗
室以慰官軍事該前巡撫河南右僉都御史簡霄
巡按河南監察御史王楠會本奏行戶部議覆准
將總部委官扣留京邊糧草羨餘銀兩發回本司
補放祿糧遵行年久稍得接濟自嘉靖三十年以
後本部將京邊扣留餘銀俱發太倉以致祿糧愈

加不敷合無查照先年事例准將京邊糧草該扣
餘銀照舊發回本司聽候專補祿糧不許別項支
用伏乞聖裁

一比例奏留事例銀兩查先為地方連歲災傷
歲派不敷歲用錢糧匱乏亟為上請早賜計處以
補祿糧以備賑濟及防秋軍餉事嘉靖三十二年
該前巡撫河南右副都御史謝存儒巡按河南監
察御史浦之浩會本奏行戶部准將軍需重大及

邊費重大二項事例銀六千九百五十兩免行解
部准留本司以補祿糧支用嘉靖三十七年為可
憐極貧宗室乞討累年祿銀急救多命事該前巡
撫河南右僉都御史章煥巡按河南監察御史楊
惟平會本奏行戶兵二部准將本司庫貯見在推
廣事例銀二千四百二兩預處馬匹事例銀一千
一十兩免行解部准補祿糧支用訖又為欽奉聖
諭事該工部題奉欽依內開河南將戶工二部節

年開納事例等銀動支十萬兩差官解送四川採
木應用除已解過銀五萬一千兩外未解銀四萬
九千兩尚無召納人員今本省祿糧缺乏無措合
無准將未解銀兩免解四川以後開納銀兩俱留
本司補放祿糧支用伏乞聖裁

一比例奏留缺官柴薪馬夫銀兩卷查嘉靖三十
二年為地方連年災傷歲派不敷歲用錢糧匱乏
亟為上請早賜計處以補祿糧以備賑濟及防秋

軍餉事該前巡撫河南右副都御史謝存儒巡按河南監察御史浦之浩會本奏准將所屬解到嘉靖三十年起至三十一年缺官柴薪銀四千八百七十五兩聽補祿糧支用嘉靖三十七年又為可憐極貧宗室乞討累年祿銀急救多命事該前巡撫河南右僉都御史章煥巡按河南監察御史楊惟平會本奏行戶部准將所屬解到見今貯庫缺官柴薪銀二千一百二十兩四錢并自嘉靖三十

七年起至三十八年止免行解部俱留本司補放
祿糧支用訖合無比照前例准將缺官柴薪馬夫
銀兩自嘉靖三十九年為始以後年分免行解部
存留本司補放祿糧支用伏乞聖裁

一奏留奉例裁省驛遞銀兩卷查嘉靖三十七年
五月內該前巡撫河南右僉都御史章煥巡按河
南監察御史楊惟平案驗各准奉部院咨劄俱行
該司會議減革大梁等驛原設浙江市戶馬價銀

一萬九千七百六十二兩二分備行浙江布政司
每年徑自解部又座船水夫銀九百兩糧僉驢頭
銀一萬四千八百四十八兩停造鋪陳銀五千四
百一十七兩六錢均徭館夫銀八千一百三十三
兩八錢一分四釐鋪陳水夫自嘉靖三十七年正
月初一日為始馬驢工食館夫自本年七月初一
日為始通扣解京議呈詳允遵依外又為災患非
常懇乞聖明俯念重地早為議處以安人心事嘉

靖三十八年該前巡撫河南右僉都御史章煥題
奉欽依將鋪陳銀內扣留三萬兩專補祿糧支用
其座船水夫驢頭館夫銀兩俱照數徵完差官類
解戶部交納訖今照祿糧缺乏合無准將前項應
該裁減水夫驢頭館夫及鋪陳銀兩俱自嘉靖三
十八年為始以後年分俱免解部存留本司補放
祿糧支用伏乞聖裁

張莊僖文集卷三

欽定四庫全書

集部

張莊僖文集卷四

詳校官庶吉士臣柳邁祖

中書臣劉源溥覆勘

總校官原任中允臣王燕緒

校對官庶吉士臣吳裕德

謄錄貢生臣李廷對

欽定四庫全書

張莊僖文集卷四

明 張永明 撰

預杜河患疏

欽差巡撫河南等處地方都察院右副都御史臣張永
明謹題為預早設法以杜河患事臣接管卷查嘉靖三
十八年二月十七日准工部咨該周王在鉉奏稱黃河
舊在河南省城北二十里外自西而東經流入海然洄

流自北而南直衝省城橫波泛濫日漸南侵離城僅十餘里患切封域乞行濬治等因奏奉聖旨該部知道欽此欽遵該本部議照會城重鎮若黃河南侵誠所當慮但未經該省撫按官員奏報應行勘處除行都察院轉行巡按御史會同踏勘外合咨前去煩為督同布按二司掌印守巡管河等官親詣河流處所逐一踏勘要見前項水勢見今是否南侵止離城十餘里應作何設法濬治使復故道其興舉工程合用夫力應作何措辦如

合用財力數多事體重大徑自具由奏請定奪若工程稍易可以隨勢隄防所費財力不多就便區處仍咨行本部查考施行等因備咨前巡撫河南等處地方都察院右僉都御史章煥會同巡按河南監察御史陳瓚案行布按二司掌印并守巡管河等官踏勘濬治本年二月十八日又准工部咨為緊急河患事該前巡撫河南等處地方都察院右僉都御史章煥題該本部議擬合候命下咨行本官會同巡按御史親詣河流處所督同

欽定四庫全書

張莊傳文集
卷四

二

都布按三司掌印守巡并管河副使及該府州縣掌印
管河等官再行相度如果前議允當別無異議即使調
集夫役動支無礙官錢先將翟家口對岸地方擇吉祭
告興工挑挖務期大勢之水引注東流然後廣集衆思
或別挑支河以殺將來水勢或培築堤岸以防後日疎
虞務使河患永息民生有賴等因覆題奉聖旨是欽此
欽遵備咨前來又經案行都布按三司掌印并守巡管
河等官查勘挑築本年八月初四日又准工部咨為災

惠非常懇乞聖明俯念重地早為議處以安人心事該
前巡撫河南右僉都御史章煥題該本部議擬合候命
下咨行接管巡撫右副都御史張永明會同巡按御史
督同都布按三司掌印守巡并各府州縣掌印各管河
等官先將近省舊堤岸增築高厚以防再至其中年等
縣泛溢水潦去處隨宜疏導捍禦以祛民患及原議挑
挖翟家口對岸或別挑支河或培築堤岸或別有長策
一應揀時之宜善後之略務要多方謀議計策萬全務

欽定四庫全書

張栻集卷四

使水歸故道始為全功合用錢糧查照舊規動支應用
若有干涉總理河道衙門亦要會同區處共濟時艱儻
錢糧不敷應須別處亦聽計處停當會奏前來以憑覆
請定奪事完通將先後開濬過工程用使過錢糧夫役
各數目造冊奏繳等因覆題奉聖旨是欽此欽遵備咨
到臣隨經催行都布按三司掌印并守巡管河等官將
原議欲於翟家口開河引水東流事宜備查所開河口
廣狹該若干深淺該若干合用錢糧該若干夫役該若

千何時可以興工何時可以就緒果否能挽河水東流
使復歸故道及別挑支河果否能殺水勢於人情事體
有無窒碍至於近省隄岸若增築高厚果否可保無虞
及中牟等縣低潦去處作何區處可以保護城池使小
民得遂安養一併查議的確呈報去後本年九月內續
據布政司呈該左布政使呂時中議照河源發自絕域
不知幾千萬里九折以達中國潼關而上涇渭諸水合
流至陝州則勢已漸大而羣山夾岸未遂瀾漫河南懷

慶以下漸受濟洛沁汜等河衆流萃匯遂為天地巨津而北方之水蓋莫有大於黃河者宋室都汴代有經略然近省者惟汴蔡諸水而黃河經城東北達海至元時河始南徙逼近開封合汴泗以入淮我朝自正統及弘治以來雖分決泛溢靡常而入淮如故此河南懷慶開封歸德一帶累遭衝決之患而徐邳以下接濟運道利亦有之至於遶城築堤賴以防護則自宋元以來咸恃以為安而我朝間有河水忽漲突入為害者則以建都

與列省既異其制而經畧與廢弛又異其防耳使其歲
加補築不令有缺豁坦薄之處則暴水雖至亦安能為
害哉爰自去年八月翟家口東岸漸淤是以河流漸南
南岸既啗則北岸益淤日淤日啗漸逼省城亦其勢也
隨該周王暨前巡撫章都御史各奏奉欽依備行前來
覆議時以事體重大議論紛紜持久未定今年六月忽
遇大雨經旬不止致將原武判官村衝決一處散漫橫
流浸繞中牟等縣以及開封大堤議者遂以為翟家口

直河不挑則近省南岸之侵噬何時可挽此其說不必
遐引遠譬即以判官村決口八百餘丈狂瀾肆溢懷襄
無涯而大河之水拍岸盈流未見減去竊恐直河雖挑
亦無以殺南侵之勢也有為神河之說者以為黃河巨
浸有神司焉挑之徒費人力無益此固荒誕無據不足
為憑有為或東或西倏南倏北遷徙無常之說者亦以
為挑之無益其言似矣而未究其故蓋河流混濁泥沙
相半昔人謂一石水六斗泥蓋已試之言顧水流有緩

急緩急所向亦無定形亦無定處流緩則泥渟泥漸渟
則地漸高流急則泥濶泥漸濶則地漸低積高成淤積
低成決故緩急之勢高低之由淤決之判也東西南北
遷徙無常率由是耳先蒙巡撫章都御史議西自翟家
口起東至時和驛東楊寬家莊止挑河一道長一十八
里口低深闊不等計用夫九千九百餘名銀二萬九千
七百餘兩續議以前項口闊底深不足以受大河之水
須口闊三里底深稱是則用夫當得六十餘萬名銀當

得一百八十餘萬兩其為工費甚鉅雖竭數省之財力
猶恐不支況中州哉邇年水旱頻仍百姓窮困庫藏空
竭道路流離積逋無筭救死不贍而欲舉大役以求成
功難矣然猶有可慮者工程既鉅非數月不可貧人俯
仰無賴朝不謀夕驅此六十萬愁苦之役而責以數月
未必可完之工萬一不逞釀成他變職恐中州所憂不
在黃河而在荷牖之衆矣然又有可慮者職前謂河流
混濁泥沙相半即使新河挑挖果成闊纔三里許耳而

大河水面少不下六七里湏洞一注容納不堪澱滯阻
塞勢復洄流而南則此不貲之費將竟付之烏有乎然
又有可慮者河流自此由歸德入淮呂梁而下伏槽安
流是以漕運有濟設新河一開果遂直往時和以東倒
海排山孰能禁禦散漫銅瓦廂而下近浸劉皮等口遠
浸楊家湖等處狂奔汎蕩潰壞漕渠彼時為力抑又難
矣數者有一於此誰任其咎古者欲適治理必順人情
人情所不欲雖聖人莫能強為今之計莫若較量挑河

與濬流孰難孰易創始與因舊孰費孰省犯水與繕堤孰險孰夷慮翟家口東岸之漸淤則相形度勢以濬之慮近省南岸之漸啗則相形度勢以堰之堰者不南濬者漸北但令東去不為省城之害斯亦可已矣判官村決口則姑俟秋盡水落冬春農隙之時拘集鄉人雜以河夫退擇堅地速築堤岸不使明年霖雨河漲再罹衝決至於省城護堤昨去水面高者一丈五尺低亦可足一丈今宜及時大加修築缺者補之卑者增之薄者培

之務使完固如此則雖卒遇泛溢而省中藩宗社稷城郭人民可恃以無恐先大學士邱濬謂治河者莫出賈讓三策與賈魯三法今完繕堤防是讓之一策而判官村用塞翟家口用濬則魯之二法具焉舍是即無策無法矣又據按察司按察使蔣宗魯都司掌印署都指揮僉事陳國清分守大梁道左叅政熊逵分巡大梁道副使沈科管河副使郭朝賓開封府知府周文管河同知李充善各議呈到臣反覆詳論挑河一節無慮數千百

言大畧相同有謂工費甚鉅雖竭數省之財力猶恐不
支者有謂黃河水無定在泥沙所過河身即平所費不
貲而功難必成成難必久為可惜者有謂翟家口十八
里之民廬舍疆場付之浚窟貧民無力遷徙攜老襁幼
將安之乎驚利於南實害於北者有謂財力天時水勢
地里人情皆非所宜者有謂前議則工小而狹恐束隘
停阻雖開而易淤後議則工大而難興恐勞費不貲非
一省之力可辦者不但是也又謂時方荒歉公私俱困

驅六十萬瘡痍憔悴之民以徼不可必成之功惟恐激
成他變以為禍本此多官之隱憂也臣猶未敢遽信督
同三司府縣等官親詣時和驛翟家口黃河南北兩岸
往來相視誠有如各官所議者而治之之法則當濬北
岸之淤以導其滯固南岸之啗以捍其衝至於塞決裁
柳漸次為之此誠簡易易行救時之急務也舍此不為
而顧欲大開河口別開支河竭空虛之庫藏以填巨壑
驅漂沒之遺民以執畚鍤挽掀天之巨浪以逼使其別

流非臣之所敢知也至謂先年河決開封誠亦有之但遶城築堤賴以防護其來遠矣間有夏秋霖雨淋漓衆水皆歸於河遂至瀰漫泛溢衝決或所不免若能時加修緝使堅厚完固水亦安能為患哉至於遷省之說龍卵之說黃河之患六十年一次之說皆足以駭人聽聞亦非臣之所敢知也臣熟思審處裁酌既定詢謀僉同隨行管河副使郭朝賓同知李充善鳩工聚材開封府知府周文擇吉興事又以大工伊始必得神相乃克有

濟謹涓十月初三日躬率三司等官攝誠祭告以祈神
休即日同知李充善督同祥符縣主簿曹守貞蘭陽縣
主簿陳完帶領河夫一千六百四十九名於時和驛北
岸壅淤之處併力以濬導之南岸衝刷之處加埽以隄
防之至十一月十三日據主簿曹守貞陳完呈報南北
二岸工已就緒水勢俱向北岸新濬河身東北流行南
岸水勢日漸迂迴不復衝刷前項工役用力省而成功
速此皆仰賴我皇上聖德格天川祗效順所致殆非人

力所能為也臣隨於本月十五日陳牲設幣躬率三司等官詣河祭報訖又行同知李充善將省城護堤修築高厚以防日後疎虞其判官村等處決口則俟冬春水落農隙拘集夫役凡堤岸衝決者逐一修補樹株枯死者逐一栽植於嘉靖三十九年四月初十等日節據管河副使郭朝賓管河同知李充善各呈稱省城護堤三重俱已督夫修完護城大堤周圍俱已起造舖房一十三所計三十九間時和驛河口修建公館八間以為巡

守員役棲息之所各將前項決口堤岸等處俱已增築
修補堅完又於滎澤原武陽武中牟祥符封邱蘭陽儀
封各縣黃河兩岸長月等堤除現在成活柳株外其餘
空缺去處應該柳樹盡行補栽其前後用過夫料數目
造冊另報各等情具呈到臣會同巡按河南監察御史
孫永思議照黃河之患自古為然河南會省距河僅十
餘里近因北岸土淤約廣數里因以逼水南行遂至南
岸侵刷漸近省城加以昨年夏秋之交霖潦時至百川

會集泛濫騰湧以為省城之害是以前巡撫官欲於翟家口對岸開河引水東注疏殺水勢蓋亦思患預防之意但計開河工役浩繁勞費不貲況今兩河地方災荒軍民困瘁庫藏空虛誠恐河工一興怨懟交作意外之虞誠所未免且該管河各官前報北岸之淤已經濬治河水東北流行南岸不至衝刷而省城與黃河南北兩岸諸處堤防又皆增築堅完設舖防守內有重堤之固外有護堤之埽似亦可保無虞今既經三司各道掌印

等官查議叅酌明白所據開河一節似應停罷然臣等私憂過計黃河變遷自古不常至於每歲夏秋之際天雨久暫不時河水消長不一以臣等之愚豈能逆料候臨期容臣等相機防遏通融調度以濟時艱不敢瑣屑以煩天聽伏望皇上勅下該部將開河一節再加詳議施行地方幸甚臣等幸甚緣係預早設法以杜河患及奉欽依事理臣等未敢擅便為此具本專差承差魏漢臣親齎謹題請旨

將材推用疏

欽差巡撫河南等處地方都察院右副都御史臣張永
明謹題為急缺將材推用事臣卷查先准兵部咨稱煩
將所屬見任大小將領并指揮千百戶以上官及廢閒
將官不係克軍為民者逐一品題要見何官堪任總兵
何官堪任副叅遊守何官堪任都司不必對偶明註實
跡徑自具奏以憑施行等因備咨到臣行據河南都布
按三司各呈該掌印署都指揮僉事陳國清左布政使

呂時中右布政使蔣宗魯副使沈科并分守大梁道左
叅政熊遠分守河南道帶管分守河北汝南道右叅政
亢思謙分巡大梁道僉事張學顏分巡河南道僉事林
騰蛟分巡河北道僉事趙河分巡汝南道副使孫渭各
呈將所屬衛所堪舉將領軍職官員開報到臣復又悉
心延訪秉公甄別于內舍短取長僅得數人敬為皇上
陳之如河南睢陳叅將署都指揮僉事胡宗義才優應
變而每蓄之以深沈智足研機而尤兼之以勇敢昔任

邊防已著鷹揚之績近征倭寇克收俘斬之功宣武衛
閒住原任大同副總兵都指揮同知田世威早閑韜畧
發跡於武科素蘊機謀馳聲於介冑握兵上谷屢成破
敵之功仗鉞雲中力却防秋之餽身雖閒散志在宣忠
以上二臣可堪總兵之任者也宣武衛閒住原任京營
佐擊將軍署都指揮僉事吳子英氣宇魁梧才猷練達
恤軍士而安靜不擾理戎務而經畧有方敵愾之氣未
衰桑榆之績可奏原任河南衛指揮同知今陞德州守

備王復乾騎射優長志氣激烈守法奉公操履已徵於
視篆運籌決策功業歷見於推鋒馭下而恩威並著臨
事則艱險不辭以上二臣可堪偏裨之任者也南陽衛
現任指揮使張廉勇足以禦侮謀足以籌邊隨父對敵
雖中流矢而不撓論功受賞盡給軍士而不吝忠信可
嘉廉仁足尚指揮僉事張焰壯盛之年驍勇之質規模
閑整而有老成持重之風紀律嚴明而得操縱張弛之
術昔領邊操而軍士帖服今司衛篆而聲譽彰聞以上

二臣可堪都司之任者也。睢陽衛副千戶朱武昌才識老成，操持謹飭，承調遣而鋒鏑不辭，戍邊隘而謀猷疊著。威武既可以臨，戎諳練尤長於料事。懷慶衛署千戶吳國年青而氣銳，志確而才優，倜儻不羣，承委敢先於赴敵。驍雄出衆，奮勇不懾，乎艱危署千戶陸淇體貌雄偉，膂力絕人，領軍入衛而甘苦必同，遇敵先登而矢石親冒。河南衛署千戶詹恩年力精壯，武藝習閑，禦強寇而不怯，曾救百人之命，破常格而委任可當一面之衝。

以上四臣可堪守備把總之任者也如蒙乞勅該部再加查訪如果臣言不謬將胡宗義等遇有員缺量才推用則感恩奮勵各効馳驅其於戎務未必無小補矣為此具本專差承差朱棟親齎謹題請旨

申明禮儀疏

都察院左都御史臣張永明謹題為申明禮儀事據河南道掌道事浙江道監察御史王漸呈稱竊照國朝設有都察院及十三道監察御史所以主持風紀彈壓百

僚至於考滿之典所以課成績而勵羣工關係為尤重也查得往昔舊規凡在京在外考滿官員進見每月俱以一六日為期自府尹府丞以至六部郎中等官皆門吏報名以次謁見各照職銜崇卑為之隆殺禮法森然有條不紊夫何近日考滿官員間有妄執已私不循舊規或見同而禮文欲殊或官同而名否欲異或考滿同而進見違期夫紀綱重地遠邇具瞻凡在各官豈容紊越至此竊照考滿事體分屬本道為此呈乞本院題請

明旨以後各衙門官員俱照臺儀謁見如有故違者聽
本院指名叅治等因到院臣等照得考滿謁見禮儀創
始非自今日奉行非止一人所以嚴等威之辨而明上
下之體也若妄意紛更其如朝廷之紀綱何哉今據該
道具呈前因相應申明遵守以後考滿官員如有故違
容臣指名叅奏懇乞聖明嚴加究治以為越分之戒以
敦禮讓之風庶事體畫一而朝廷之紀綱振肅矣等因
題奉聖旨這考滿官儀節都着如舊府尹府丞應否考

覈還查明行

劾羅良疏

都察院左都御史臣張永明謹題為恣肆司官背違明旨輒行妄辯懇乞聖明俯賜究治以重考覈以肅風紀事本月二十四日據經歷司抄呈朝報內該吏部文選司署郎中主事羅良奏要都察院考滿不拘日期不令報名臣聞之不勝駭異蓋以本院一六日考滿見堂乃百餘年相沿舊規緣在京在外考滿官員一月之內非

止一人而詳考其行難以一日必須數日覈實始可類
咨過部若如羅良之辯不但考覈欠詳抑且移文繁亂
況考滿歷及三年見堂在一日良謂妨廢職業欺妄何
甚焉良又謂郎中王國光等考滿見堂或報官銜或免
見或不報官銜蓋以二十七年故都御史屠僑徇伊親
郎中張濂之請漫不報名後遂因循未即改正至今士
論莫不曰壞都察院見堂之儀者屠僑也該臣永明與
陞任左副都御史毛愷申明二十七年以前舊規出示

司務廳令六部郎中等官俱照舊規報名見堂未幾郎中胡汝桂考滿到院乃不循報堂之規輒自升臺相見任情越禮莫此為甚隨據掌河南道監察御史王漸具呈申明禮儀臣具奏奉聖旨這考滿官儀節都着如舊欽此欽遵夫何奉旨未久而抗違隨至臣不知良果何人而敢悖肆至此也良謂考滿官或免見蓋以郎中陸光祖見堂時偶值霖雨大注是日見堂非一人免見非止光祖良必欲霑衣濡足于霖雨之中果近人情乎良

又謂吏部都察院綱領庶官事體相同都察院唱名儀
節稍異臣看得考滿官唱名不獨都察院為然吏部凡
遇考滿官過堂皆官吏堂上執簿呼名各官堂下隨呼
答應此不獨科道郎中即卿寺堂官無異今良不言報
名現行於吏部而謂都察院儀節稍異何其謬妄不思
之甚也良謂是月初九日六年已滿二十二日於都察
院見堂一時儀節未定未令相見良之欺妄至此尤甚
蓋是日良未曾到院止詣臣私宅謁見抗言講禮曰若

不報名我來考滿若報名寧不考滿臣謂三年考滿朝廷定制見堂報名奉有明旨誰敢違之今良乃云於都察院見堂未令相見豈惟誣臣至謂一時儀節未定視明旨若罔聞知其欺上蔑禮抑又甚矣臣嘗聞在昔文王之世士讓為大夫大夫讓為卿今良乃一部屬耳獨無可讓者乎卿寺等官無論今各部尚書侍郎考滿到部見堂官則在後堂並立相揖拜司官則在門裏南面答禮是堂官之體面輕於司屬而司官之禮度反隆於

堂官矣冠履倒置禮法不經良謂濟濟師師果如斯義
否乎臣荷蒙聖恩畀以風紀重任若不當與司屬相較
但事關紀綱大體臣等不敢為一身私圖甘於緘默叅
照文選司署郎中主事羅良在昔倚托權門久不齒於
士論迨今濫叨選部素不協乎輿情應考滿而捏言不
赴郎官之職業何稽奉明旨而故意抗違臣子之靖共
奚在存心詭譎敢倡驕悖之風負氣滿盈殊乖遜讓之
誼伏望皇上軫念都察為朝廷紀綱重地百僚具瞻考

滿乃國家黜陟大典庶績攸賴乞賜乾斷將羅良以不
謹罷黜勅下九卿等官再不許至四司門揖以長後進
浮薄之習仍乞勅下該部行令各官凡三六九年考滿
務要照例依期赴院考覈如有托故不行赴考者容臣
指名叅究庶部屬等官不致效尤而濟濟師師之風聿
見於堯舜之世矣為此具本親齋奏聞伏候勅旨

附禮部覆疏

禮部等衙門一本恣肆司官違背明旨輒行妄辯懇乞

聖明俯賜究治以重考覈以肅風紀事該都察院左都御史張永明題前事奉聖旨文選郎中考滿見堂既節年行禮不一羅良姑罰俸兩箇月奏內儀節禮部會同該科詳議來說欽此隨該都察院經歷司送到儀節內開各衙門考滿官俱限一六日見堂及開郎中等官由門吏報名升臺等因又該文選司送到儀節內開各部都察院通政司大理寺四品以上官翰林院國子監春坊司經局五品以上官陞遷考滿到部俱由後門進入

與本部堂上官後堂相見仍到四司門揖及開郎中等
官見堂係司務報名若考滿係考功司郎中唱名等因
各開報前來臣等會同禮科都給事辛自修等看得左
都御史張永明隨稱吏部郎中等官考滿務要依期赴
院報名見堂及稱九卿等官不得至四司門揖各一節
為照憲臺職司風紀其威儀體統係百僚之具瞻自難
因人隆殺選郎雖居要路然品秩斑行亦六曹之儔侶
豈宜獨示優崇祇緣銓衡為事權所在而莫敢誰何未

免漸加尊大亦有體貌因訛謬相承而失於釐正遂致踵為故常即如考滿日期在諸司悉皆安分奉約而獨抗辨於選郎者無非憑藉事權而欲行違衆之殊禮如九卿等官與堂官既已分庭叙坐而反仰揖於司屬者寔乃因循訛謬而必非禮典之舊規既該左都御史張永明論奏前因通應議處臣等詳擬得今後吏部郎中等官應該赴院考滿者俱令依期見堂不得自立同異九卿翰林等官凡由吏部後門者止於後堂公見不得

遍揖四司如此庶紀綱齊一名分不紊矣至於郎中等
官報名見堂吏部則係司務郎中稟引都察院則由門
官傳唱部院事體相同而儀節稍異臣等不敢定擬伏
乞聖裁奉聖旨是部院一體該院報名見堂着照吏部
行

劾黃廷聘疏

都察院左都御史張永明為貪鄙不職憲臣乞賜罷黜
以正紀法事案照先該巡按浙江御史黃廷聘差往浙

江巡按一年已滿例該差官更替等因到院隨該臣奏
請點差江西道御史龐尚鵬前往浙江去後查得龐尚
鵬已於四十四年六月二十八日至浙江交代接管訖
今已四越月矣黃廷聘尚未回道臣正疑其遷延日久
必有別情近訪得本官交代後果私自回家行至湖廣
衡山縣地方比因本官性氣暴戾激怒知縣陳安將行
李扛箱通行盤詰盤出銀八百餘兩數雖未的迹則已
彰又聞屈禮縣官復將銀領回臣聞之不勝駭愕竊惟

御史者風紀之官所以激濁揚清朝廷賴之以振肅庶僚者也必無欲以澄源正己以率物一切財用無與焉如公費廩餼自有常規皆有司驛遞公應之此外不得擅取分文銀錢囊中如洗其憲體當爾今銀兩數多如斯非苟取何從而得且路出衡山枉道回家及犯有贓私者節奉明旨俱聽臣叅奏罷黜今御史黃廷聘交代已久枉道回家又犯有贓私正合罷黜之例叅照御史黃廷聘心同賈豎行若穿窬祇知玩法容私奚有風霜

之面罔知正身率下惟貪暮夜之金苟黷貨以盈箱敢
迂途而返轡憲職大壞有玷西臺穢德遠聞貽羞東省
此不可一日居乎其官者也伏望皇上俯察臣愚言非
謬妄將黃廷聘速賜罷黜以為風憲不職之戒奉聖旨
是黃廷聘着閒住吏部知道

辭左都御史疏

刑部尚書臣張永明謹奏為感激聖恩辭免重任事本
年九月二十八日准吏部咨該本部等衙門會推都察

院左都御史員缺奉聖旨張永明改都察院左都御史
欽此欽遵備咨到臣寵命下臨戰兢無措竊念臣一介
庸流遭逢神聖拔置刑曹惟恐奉職無狀以辜任使之
明方虞譴斥之加詎意推遷之及矧中臺係綱紀之司
都御史為風憲之長苟非其人曷稱斯任臣惟鞠躬盡
瘁不敢有辭者固臣子委身之義審已量力不敢自昧
者實臣子事君之忠故効勞之心雖無窮而自審之分
則有限是以披瀝悃誠冒瀆君父之前伏望皇上收回

成命容臣勉脩舊職以圖報於將來臣愚幸甚臣下情
無任感激祈懇之至為此具本親齎謹具奏聞

辭刑部尚書疏

吏部右侍郎臣張永明謹奏為懇乞天恩辭免陞任事
本年五月初五日准吏部咨該本部等衙門會推刑部
尚書員缺伏奉聖旨張永明陞刑部尚書欽此欽遵備
咨到臣伏念臣以一介庸愚乍蒙皇上拔置銓曹之二
雖矢刻心骨以求效萬一自省迂疎不足以仰酬聖明

知遇日夕方抱惶悚詎意皇上特賜超遷渙汗下臨臣叩頭捧讀感激之私非言語所能形狀顧惟司寇之官實掌邦禁之職必得廉平長厚練達吏事者斯稱其任如臣謏陋豈所宜堪是以披瀝悃誠冒瀆君父之前伏望皇上收回成命容臣勉脩舊職以圖報於將來臣愚幸甚臣下情無任祈懇待命之至為此具本親齋謹具奏聞

謝恩疏

刑部尚書臣張永明謹奏為恭謝天恩事本年五月初五日欽蒙聖恩陞臣刑部尚書隨該臣具疏辭免奉聖旨卿才猷練達司寇重任特茲簡擢宜承朕命不允所辭吏部知道欽此欽遵除赴鴻臚寺報名廷謝外臣誠惶誠恐稽首頓首上言陳謝者伏以政貳銓衡方切負乘之懼職司邦禁復叨超擢之榮仰戴恩綸控辭莫遂顧念臣才疎讀律學昧通經敬天命以奉一人懷忠惟切隸民彝而成三德効績何能茲蓋伏遇皇上德育下

車仁敷解網良惟折獄惠在安民式保大於包荒不求
全於器使肆以凡庸之品亦歸甄錄之中感幸為多實
荷天日無私之照叨榮已甚乃蒙雨露不次之恩臣敢
不祇率屬僚宣揚德意務盡一心以靡怠堅持三尺而
弗撓仰體浩蕩好生之仁勉竭涓塵服勞之義伏願玄
禧益茂帝眷彌隆萬壽綿洪同天長而地久八方寧謐
恒海晏以河清臣無任瞻天仰聖感激屏營之至為此
具本親齋奏謝以聞

又謝恩疏

都察院左都御史臣張永明謹奏為恭謝天恩事准吏部咨該本部等衙門會推題奉聖旨改臣都察院左都御史欽此隨該臣具疏辭免奉聖旨卿才行老成風紀重任特茲簡用不允辭吏部知道欽此欽遵除赴鴻臚寺報名廷謝外臣誠惶誠恐稽首頓首上言稱謝者伏以職司總憲允為法紀之宗位列中臺特重風猷之選提綱而飭吏治肅度以贊廟謨自非邁德之賢曷稱具

瞻之望如臣庸劣忝竊踰涯方慚舊職之未脩何意新恩之遽及懇祈恩免真知蚤負之難勝重拜溫綸愈沐鴻慈之下逮戰兢罔措感激何言茲蓋伏遇皇上德並海涵仁同天覆善無求備不因葑菲而下遺寬以有容罔擇涓流而畢納遂致微臣之樸樾亦蒙大造之甄收臣敢不益勵初心堅持晚節正身率屬務期職任之咸脩秉道協中必使綱維之克振伏願皇猷日麗聖壽天齊綱舉目張永致昇平之化河清海晏益隆熙皞之風

臣下情無任瞻天仰聖激切感戴之至為此謹具本親齋奏謝以聞

又謝恩疏

都察院左都御史臣張永明謹奏為恭謝天恩事本年某月某日伏蒙聖恩以臣三年考滿欽遣內監張誠齋捧鈔二千貫羊一腔酒十瓶頒賜到臣謹焚香望闕叩頭祇領隨赴鴻臚寺報名次日於午門前謝恩外臣誠惶誠恐稽首頓首上言稱謝者伏以國典課功績效未

徵於明試聖恩敷錫寵光特被於匪頒循省曷勝凌兢
無措竊念臣備員臺省深慚綱紀之司冒歷歲年未効
涓埃之報豈期大賚爰及微臣玉醪芬苾香浮尊華之
春牲鏘輝煌喜動門闌之色非望所及何功以堪茲蓋
伏遇皇上仁覆堯天典成萬物知臨舜日光被四方式
保大於包荒不求全於器使顧以樗櫟下材亦得濫叨
渥澤惟深感激莫罄名言臣敢不益勵愚忠誓堅初志
旨酒思勞贊王道和平之化羔羊秉節率官常正直之

風伏願德並重玄超三皇而軼五帝壽綿萬載光七耀而配兩儀久綏寶厯於無疆克奠金甌於有永臣無任瞻天仰聖欣躍感戴之至為此具本親齎奏謝以聞

乞休致疏

都察院左都御史臣張永明謹奏為衰老目疾懇乞天恩容令休致事臣由進士授蕪湖縣知縣選南京刑科給事中歷任藩臬以至今職受我皇上天高地厚之恩未効絲粟涓埃之報夙夜兢惕不敢怠遑近因年力衰

遲目疾更熾自量難以勝任具本懇乞休致該吏部覆
題奉聖旨張永明着照舊供職欽此臣聞命流涕不勝
感激竊念臣猥以寒微遭逢神聖久叨重任恒以負乘
懷憂過被寵榮又以逾涯祗畏益堅素履勉勵匪躬第
臣年六十有八血氣已衰又兼目疾夫人臣任事必精
力强健方能有為今臣衰老目疾自揣難圖後效若不
引退必致荒廢職業將來負罪逾深萬死不足贖也是
以不得已哀鳴於君父之前伏望皇上念都察院為風


紀重地關係匪輕非臣衰病所宜久冒乞勅吏部容臣
致仕別選賢能以充斯任俾臣得就醫調治倘獲苟延
殘喘則將來歲月皆皇上生全之恩矣臣無任激切祈
懇悚息之至奉聖旨張永明着照舊供職不准辭吏部
知道

再乞休致疏

都察院左都御史臣張永明謹奏為再瀝悃誠懇乞天
恩容令休致事臣以衰老目疾兩疏乞歸該吏部覆題

聖旨張永明着照舊供職不允辭欽此臣聞命流涕不勝感激竊念臣猥以寒微遭逢神聖久叨重任恒以負乘懷憂過被寵榮又以逾涯祇畏自分曠瘼罪已深於日積乃蒙渥眷恩實出於海涵臣雖粉骨碎身無以為報豈忍托疾固辭負陛下知遇哉第臣年近七十血氣已衰兩目昏花四肢痿倦近兼痰嗽脾泄飲食少進日甚一日夫人臣任事必精力強健方能有為今臣衰老多疾自揣難圖後效若不引退必致荒廢職業將來負

罪愈深萬死不足贖也是以不得已哀鳴於君父之前
伏望皇上念都察院為風紀重地關係匪輕非臣衰病
所宜久冒乞勅吏部容臣致仕別選賢能以充斯任俾
臣得就醫調治倘獲苟延殘喘則將來歲月皆皇上再
生之恩矣臣無任激切祈懇悚息之至為此具本親齎
奏聞奉聖旨張永明既年老目疾准致仕還着馳驛去



張莊僖文集卷四